

SCRIPT OF MORNING GOJRI NEWS BULLETIN 27AUG 2026 1015HRS

مارننگ گوجری نیوز بولٹن 27 اگست 2026

یوہ آکاشوانی جموں ہے باغ علی طاہر تیں خبر سُنو۔

LG QUATERNARY HEALTHCARE

لیفٹیننٹ گورنر منوج سنہا نے کل سرینگر مانہ منعقدہ چوتھا درجہ غی صحت سہولتاں تے تحقیق بارے اجلاس سنگ خطاب کیو۔ اجلاس سنگ اپنا خطاب مانہ اُن گو کہنو تھو جے یوہ اجلاس جموں کشمیر غا صحت سیکٹر غا سفر گو ایک اہم موڑ ہے جتوں جموں کشمیر یو ٹی تے قوم نانہ تیسرا درجہ ترین غی صحت سہولتاں تیں اگے بدھ غے چوتھا درجہ غی جدید ترین سہولتاں تے تحقیق نانہ اپنا غی لوڑ ہے۔ تانجے شہریاں نانہ بروہری غی بُنیاد ور بہتر صحت سہولت میسر آسکیں۔ اُنہاں نے زور دیتا واں کہیو جے جدید ترین طبی سہولت چھڑی بڑا شہراں توڑی ہی محدود نی رہنی چائیں بلکہ یہ سہولت ہر شہری نانہ یقینی طور ور ملنی چاہیں۔ اُن گو کہنو تھو جے جدید ترین چوتھا درجہ غی طبی سہولت میسر کران غی خاطر تمام فریقاں ، نجی اسپتالاں تے تحقیقی مرکزاں غی طرفوں رل غے کوشش کرن غی لوڑ ہے۔ تانجے جدید ترین درجہ غی طبی سہولت ہر شہری توڑی دستیاب کرائی جاسکیں۔

LG NITI AYOJ

نیتی آیوگ گا ممبر ڈاکٹر سری نواس نے آیوگ گا سنٹر عہدیداراں غے ہمراہ لوک بھون سرینگر مانہ لیفٹیننٹ گورنر منوج سنہا سنگ ملاقات کی ہے۔ ملاقات غے دوران ڈاکٹر سری نواس تے نیتی آیوگ غی ٹیم نے جموں کشمیر غا ترقیاتی منظرنامہ گو تخمینو پیش کیو۔ جس مانہ اس شعبہ غی حصولیا بیاں اہم کمپاں تے ممکنہ دخل اندازیاں ور لوہ پائی گئی۔ جھڑی یوٹی غی سماجی تے اقتصادی ترقی غی رفتار مانہ حاصل ہوسکیں۔ اس تخمینہ مانہ انسانی وسائل غی ترقی اقتصادی موقعا تے ترقیاتی ٹانچہ غا فروغ غا شعبا شامل کیا گیا۔ میٹنگ غے دوران ایل جی موصوف نے نیتی آیوگ غی طرفوں پیش کیا گیا جامع شعبہ جاتی تخمینہ غی سراہنا کی تے حالیہ بہراں غے دوران جموں کشمیر مانہ شروع کیا گیا نمایاں ترقیاتی پروگراماں غی جانکاری سانجی کی۔

LG JFF

جموں فلم میلہ غا ڈائریکٹر، روہیت بھٹ نے کل لیفٹیننٹ گورنر منوج سنہا سنگ ملاقات کرغے اُن نانہ آئیندہ ستمبر مہینہ غی 28 تے 29 تاریخ نانہ جموں مانہ فلم میلہ غا پنجواں ایڈیشن گا انعقاد بارے جانکاری دتی۔ اس موقع ور جانکاری دتی گئی ہے جے سال 2026 غا اس فلم میلہ غی خاطر دُنیا غا 35 مُلکاں تیں 2 سو 10 فلماں غی نمائش بارے گزارشاں موصول ہوئی ہیں جس غے بعد 16 مُلکاں غی کُل 41 فلماں نانہ چُنیو گیو ہے۔ استوں علاوہ جموں کشمیر غی 12 علاقائی فلم وی اس فلم

میلہ غے دوران نمائش کی جئیں غی۔ جن نانہہ علیحدہ تیں اک خصوصی علاقائی نمائش گا حصہ مانہہ پیش کیو جائیگو۔

POONCH ACCIDENT

ضلع پونچھ غی سرنکوٹ تحصیل غا شندرا علاقہ مانہہ گزشتہ شام پیش آیا اک دردناک سڑک حادثہ مانہہ 6 افراد جاں بحق تے 3 دوجا زخمی ہو گیا ایں ۔ پولیس ذریعہاں نے جانکاری دیتا واں دسیو ہے جے شندرا غے نیڑے اک ماروتی ایکو وین نانہہ حادثہ پیش آگیو ، جھڑی سیری چوآنا تاپ علاقہ در سفر کررئی تھی۔ یاہ بدقسمت گڈی سڑک وروں رُڑ غے دونگی کھائی مانہہ جالگی۔ اس ایکو وین مانہہ سوار افراد عید میلاد لنبی گا اک اجتماع مانہہ حاضری تیں بعد کھر واپس آرہیا تھا۔

LG CM CONDOLENCES

اسے دوران لیفٹیننٹ گورنر منوج سنہا تے وزیر اعلیٰ عمر عبداللہ نے اس حادثہ مانہہ ہوا جانی نقصان ور سخت صدمہ گو اظہار کیو ہے۔ سماجی میڈیا ور اپنی بکھ بکھ پوسٹاں مانہہ لیفٹیننٹ گورنر تے وزیر اعلیٰ غو کہنو تھو جے وے غم غی اس گھڑی مانہہ سوگوار خانداناں سنگ تعزیت کرن غے نال نال زخمیاں غی تاولاں صحت یابی واسطے دُعا کر رہیا ہیں۔ انہاں نے ضلع انتظامیہ پونچھ نانہہ ہدایت کی ہے جے وے زخمیاں نانہہ ہر ممکن بہتر علاج مہیا کراویں۔

TERROR ASSOCIATES ARRESTED

وادی کشمیر غا کلگام ضلع گا بوگام علاقہ مانہہ سلامتی دستاں نے کیرہ بندی کر غے کی گئی اک تلاشی کاروائی غے دوران دہشت گرداں غا 5 ساتھیان نانہہ گرفتار کرلیو ہے۔ اس سانجی کاروائی مانہہ فوج جموں کشمیر پولیس تے سی آر پی ایف نے حصو لیو۔ اس تلاشی کاروائی غے دوران اک جنگی نوعیت غا سٹور گو پتو لایو گیو۔ جتوں 4،9 ایم ایم پستول ، پستول غی 4 میگزین، 2 ہتھ گولا تے گُج ہور گولی سکو برآمد کیو گیو۔ گرفتار کیا گیا افراد نانہہ بعد مانہہ مزید تحقیقات غی خاطر جموں کشمیر پولیس غے حوالے کردتو گیو ہے۔

HEROIN CARTEL BUSTED

منشیات کنٹرول بیورو این سی بی جموں غی طرفوں کل اک کاروائی مانہہ سرحد پار تیں ہیروئن سمگل کرن آلا گروہ غو پتو لایو گیو ہے۔ پکڑیا گیا اس گرو غا افراد غا قبضہ تیں 5 عشاریہ اک چھ کلو گرام وزنی منشیات ضبط کی گئی ہے تے اس سلسلہ مانہہ 3 افراد نانہہ گرفتار کرلیو گیو ہے۔ جن مانہہ اس گرو غو برو منصوبہ ساز وی شامل ہے۔ بار آلے روز اک خاص سومن غے بعد اک گڈی نانہہ جموں شہر گا پنج تیرتھی علاقہ مانہہ روکیو گیو تے گڈی مانہہ سوار 2 افراد تیں کروڑاں روپیاں غی قیمت غی ہیروئن ضبط کرلی گئی۔ ان دواں افراد غو تعلق شمالی کشمیر غا بارہمولہ ضلع سنگ دسیو گیو ہے۔ مشکوک منصوبہ ساز وی ضلع بارہمولہ گو بسنیک دسیو گیو ہے جس نانہہ سوار آلے روز لداخ تیں گرفتار کیو گیو۔

SPORTS INFRA-UDH

مغربی ادھمپور قصبہ غا نوجوان بچاں تے بزرگ شہریاں نانہہ مقامی کھیڈاں تے تفریح ٹانچہ تیں فائدو پُجان غا ارادہ سنگ حلقہ ترقیاتی فنڈ تیں حاصل ہون آلی 60 لکھ روپیاں غی لاگت سنگ 3 نواں پارک تے کھیڈ میدان تعمیر کیا جارہیا ہیں یہ پارک تے کھیڈ میدان اومارہ سنسو تے کیمنل ڈنگا گا مقامات ور تعمیر کیا جارہیا ہیں تے اس راہ ہر پروجیکٹ ور 20 لکھ روپیاں غی رقم خرچ کی جائیگی۔

FOOD SAFETY RBN

کھان پین غی چیزاں تے خاص کر مٹھایاں تے دودھ تیں بنی چیزاں مانہہ ملاوٹ تے غیر معیاری نالے سفائی ستھرائی مانہہ کمی غا پہلواں ور نظر رکھن غی خاطر آئیندہ رکشہ بندھن غا تہوار تیں پہلاں ضلع رام بن غا خوراک تحفظ محکمہ غی طرفوں کی جان آلی مراننہ غی کاروائی مانہہ باندو کیو گیو ہے ۔ محکمہ نے صارفین نانہہ صلاح دتی ہے جے وے مٹھائیاں وغیرہ چھڑی رجسٹریڈ شدہ تے نیک نامی آلی دکانداراں غا درست خوراک تحفظ لائسنسناں نانہہ خریداری تیں پہلاں چیک کرلیں غی وی صلاح دتی ہے۔
